

FARC gerrillak oraingoz ez die bake negoziazioei ekingo

Gobernuaren proposamena aztertzeke denbora behar du

Agentziak / Bogota


Caqueta departamenduko eskualde desmilitarizatua batzartuta izan dira bi egunez Kolonbiako Gobernuak ordezkariek eta FARC gerrillakoak. Bilera horien hel-

burua bake negoziazioak abian jartzea zen, eta Gobernuak zein FARCEk beren proposamenak azaldu dituzte. Hala ere, Andres Pastrana kontserbadorearen gobernuak ez du bete xedea: bake elkarriketak berehala hastea.

GOBERNUAREN eta Kolonbiako gerrilla nagusiaren arteko batzarraren helburua zen duela hiru hilabete bertan behera geratutako bake elkarriketak berriro hasiko zituztenetz erabakitzea. Horretarako, hamar puntuko agiri bana aurkeztu zioten elkarri Gobernuak eta Indar Armatu Iraultzaile Kolonbiarrak (FARC), negoziazioekin aurrera segitzeko beharrezko ikusten zituzten baldintzak azaltzeko.

Bileretako giroa atsegina eta lana emankorra izan zela esan zuen atzo Victor Ricardok, Kolonbiako Gobernuak Bakerako komisarioak, baina, hala ere, ez dirudi Gobernuak bere helburua lortuko duenik: negoziazioak berehala hastea.

Izan ere, elkarriketak oraingoz «geldirik» daudela adierazi zuen atzo Raul Reyesek, FARCEko hiru ordezkarietako batek. Reyesek emandako azalpenen arabera, Gobernuaren proposamenak, batik bat, paramilitarren aurkako borrokari buruzkoak, jaso eta ondo azertu nahi dituzte, eta horretarako denbora dezente beharko dute. «Ondorioz, oraingoz ez diegu bake negoziazioei helduko», argitu zuen.



Raul Reyes FARCEko buruzagi eta batzarreko ordezkarik eta bozeramaileetako bat, kazetariekin hizketan.

Esan bezala, Gobernuaren xedea elkarriketak berehala hastea zen, eta, horretarako, agenda bakar bat hitzartu nahi zuten gerrillarekin. Elkarriketak egin ahal izateko Caquetako 43.000 metro koadroko eremu batetik Armada erretiratu zuen Pas-

trana lehendakariak, baina maiatzaren 7an bukatuko da desmilitarizazio epea.

Ildo horretatik, Pastranak esan zuen baldin eta gerrillak bakerako borondatea badauka ordurako onartu egin behar duela elkarriketak hastea.

laburrean

ALJERIA

■ FISek ez ditu onartu hauteskundeetako emaitzak

ABDELAZIZ BOUTEFLIKA lehendakari berriarekin ez duela inolako akordiorik hitzartuko esan du Salbaziorako Fronte Islamiko lege debekatuak (FIS). Abassi Madani buruzagiak «ilegitimotzat» jo ditu joan den ostiraleko hauteskunde emaitzak eta Abdelaziz Bouteflikaren garaipena. Baina erbeste-an dauden alderdiko buruzagiek ez dituzte baieztatu Madanik esandakoak.

ISRAEL

■ Israelek estatuen sorreraren 51. urteurrena ospatu du

ATZO 51 urte Israelgo Estatuaren sorrera aldarrikatu zuela David Ben Gurion buruzagi sozialistak, Palestinako lurretan. Herriar gehienek ospatu zuten Israelen. Ortodoxoek eta arabiarrek, ordea, ez zuten jaiarekin bat egin. Ortodoxoen arabera, Israel Idatzi Sakratuetan idatzia dagoen gisa sortu zuen Jainkoak. Arabia-rrerentzat, berriz, *nakba* (hondamendi nazionala) izan zen Israelen sorrera.

TADJIKISTAN

■ Bahitzaileek aske utzi dituzte hegazkin bateko bidaiariak

BAHIKETA ezohiko bat gertatu zen atzo Duxanbetik Moskura zihoan hegazkin batean. 136 bidaiari zihoazen bertan. Bidaiarietako batek «idatzi arraro» bat eman zion azafata bati. «Minak daude hegazkinean, Teheranera joateko exijitzen dugu», zioen idatziak. Hegazkina Errusian, Samarako aireportuan, lurreratu zen. Hasieran bahitzaileak kurduak zirela uste zuten, baina gero jakin zen zirela haiek izan.

EKUADOR

■ Gobernuaren aurkako protestak ez dira eten

ABERRIAREN Fronteak deituta, Gobernuaren aurkako ibilaldia egin zuten atzo Quiton. Estatu enpresak pribatizatzeke legea eta langile publikoak kaleratzeko indargabetzeko exijitzen diote herriarrek Kongresuari.

Sierra Leonako matxinoek ehunka zibil hil dituztela esan du ECOMOGek

■ Fronte Iraultzaile Batuko buruzagiak su-etena aldarrikatu nahi du

Agentziak / Freetown

ECOMOG-EKO indarretatik ihesi zihoazen Fronte Iraultzaile Batuko (FIB) gerrillariak ehunka zibil hil zituzten, joan den asteburuan, Songo herrian.

Sierra Leonako Gobernuaren alde ari da borrokan ECOMOG indarra, eta Afrikako hainbat herriar soldaduak biltzen ditu. FIB, berriz, Gobernuaren aurkako gerrilla da.

Olu Kuladek, ECOMOGeko indarren koronelak, esan zuen gerrillariak ihesi zihozela hilketa egin zutenean Songon. Songo herria Freetown hiriburutik ehun kilometro ingurura dago, eta hiriburua herrialde osoarekin lotzen duen errepide bazterean.

FIBeko gerrillariak Sierra Leona erdiko basoetan ezkutatzatzen dira, eta Songo herriar igaro behar dute derrigorrez, erasoak egiteko basotik irtezen direnean.

ECOMOGek nazioarteari dei egin zion jana eta botikak bidal ditzan. FIBeko gerrillariak «lur errearen» politika egiten dute: erasotzen dioten gunea kiskaltzen dute, eta hango janari guztia eramaten.

FIBeko buruzagiak Lomen (Togo) bilduko dira laster, ostirala baino lehen agian, Sierra Leonako Gobernuaren aurka egiten ari diren borrokan armak utzi edo ez aztertzeke. Foday Sankoh FIBeko buruzagiak su-etena nahi du, eta horren komenigarritasunaz konbentzitu nahi ditu komandanteak.

Gerrillaren bilera

FIBen bileran parte hartuko dute Sankoh-ek, Sam Bockarie buruzagi militarrek, Joseph Momoh-ek eta Johnny Paul Koroma teniente koronelak. Sankoh 97an atxilotu zuten, eta kartzelan dago hurrezkeror. Bileran egoteko askatuko dute, baina ondoren kartzelara itzuli beharko du.

Sierra Leonan orain bi urte pasatxo hasi zen gerra zibila. Koromak agintetik bota zuen Ahmed Tejan Kabbah lehendakaria. Tejan berriz agintean jarri zuen ECOMOGek iazko martxoan, baina bi aldeek arteko enfrontamenduak ez dira gelditu.

Bahituak askatzeko eskatu dio Aita Santuak ELN gerrillari

Agentziak / Vatikanoa

APIRILAREN 12an, hegazkin zibil batean zihoazen bidaiari guztiak bahitu zituen Kolonbiako Askapen Nazionalerako Armada gerrillak (ELN), eta haiek aske uzteko eskatu dio Joan Paulo II.a aita santuak.

Asteazkeneroko agerraldi publikoa egin zuen atzo Aita Santuak Vatikanoko San Pedro plazan, eta erromes gaztelaniadunei egindako agurrean egin zuen eskaera

hori. Hain zuzen ere, bahituak aske uzteko «sutsu» eskatzen ziela esan zien Joan Paulo II.ak ELNko buruzagiei 25.000 lagunuen aurrean egindako hitzaldian.

«Pertsona horiek beren borondatearen kontra daude zuen menpe. Horregatik eskatzen dizuet jarrera injustu hori bertan behera uzteko, pertsona horien eskubideak bortxatzen ari baitzarete eta askatasuna

kentzen», nabarmendu zuen Joan Paulo II.ak.

Gainera, bahituak aske uztea guztien onerako dela adierazi zuen Aita Santuak, bide horretatik Kolonbiako bake prozesuak aurrera egitea erraztuko delako. Hala, berriz, bake prozesu horren alde otoitz egiten duela jakinarazi zuen.

ELN Kolonbiako gerrilla nagusia da FARCEn ondoren, eta Gobernuarekin baditu harreman batzuk.